

չէ օրէնք սահմանել և դրանով ենթադրել Հոգի խնդիրը կարգադրած: Մեր սահմաններում կայ մի բուն ժողովուրդ, որը խապառ զուրկ է Հոգից և որը ծանրանում է կառավարութեան վրա: Ի՞նչ արաւ մեր կառավարութիւնը մի ափ հող, գլուխ դնելու մի տեղ, իր աշխատանքով ու քրտինքով ապրելու մի միջոց տրամադրելու այն ժողովուրդին, որը այստեղ եկաւ և որը խոշոր դեր ունեցաւ վերջին յաջողութիւնների մէջ և որի կողքին, ըստ հռետոր բանախօսի, գոյութիւն ունեն «Հոգի աղնականներ», որոնք մեր թիկունքից խփում են մեզ: Հողային խնդիրը մեր երկրի կենսական խնդիրներից մէկն է — կասկած չկայ, բայց այդ կենսական խնդիրը չզործածենք միայն «նախընտրական պայքարի» իբր առարկայ, ինչպէս որ նկատում էր տեղական թերթերից մէկը անցեալ սեպտեմբեր ամսին:

Եւ յետոյ այս մեր պետականութիւնը հայ ոգով: Ընդունում եմ, որ պէտք է նիւթական դիւրութիւններ տալ մեր պաշտօնեաներին ու բանակին, որպէսզի ի վիճակի լինեն աշխատելու. ընդունում եմ, որ անհրաժեշտ է միջոցներ ձեռք առնել կուէլու բոլոր նրանց դէմ, որոնք մեր հանրապետութիւնը վտանգում են, բայց պ. նախարարապետը ոչ մի անգամ անդրադարձաւ այն իրողութեան վրա — ռուսականութեան վրա, որը երէկի ժառանգութիւնն է, այսօր ապրում է և որի պատճառով, դժբախտաբար, ոչ մի անգամ պիտի կարողանայ հայ ոգին ու միտքը ապրել ու ապրեցնել մեր պետութիւնը, մեր ինքնուրոյնութիւնը: Ի՞նչ արաւ կառավարութիւնը մեր բանակից վտարելու ռուս ոգին ու կարգերը: Ի՞նչ արաւ նոյն կառավարութիւնը պաշտօնատներից վերջնականապէս վտարելու ռուս լեզուն և ռուսախօս պաշտօնեաներին: Ինչո՞ւ մինչև հիմա մեր կառավարութիւնը հայերէնի չվերածեց մեր հեռագրի ու հեռախօսի, նամակների ու Հասցէների լեզուն:

Եւ դիտէք ի՞նչ. եթէ սխալ տեղեկութիւն չեն տւել ինձ, ընդհակառակը, մեր կառավարութիւնը որոշել է տարրական դպրոցների մէջ վերահանգնել ռուսաց լեզուի դասաւանդութիւնը. ինչո՞ւ — ընաւ հասկանալ չես կարող և ոչ մի անգամ կարող ես հաշտել: Ո՞րն է դրդապատճառը այդ վերադարձին, ինձ համար յայտնի չէ, բայց այդ բաւական է ապացուցանելու այն ոգին, որը օտարինն է, որը ապրում է և վախենում եմ, որ ապրի և՛ վաղը:

Քանի կայ այդ մտայնութիւնը, քանի դեռ ապրում է ռուսը այս խորհրդարանում, մեր կառավարութեան և ժողովրդի մէջ, այնքան ժամանակ վտանգւած է մեր հանրապետութիւնը:

Կարո՞ղ է մեզնից մէկը երաշխաւորել, որ յիշած պայմաններում ապրող մի ժողովուրդ, օտարի շնչով ու ոգով սնւած մի կառավարութիւն կարող է երկար գոյութիւն ունենալ: Ես լուրջ կասկածներ ունեմ և, չպէտք է թաքցնել, ես վախենում եմ նոյնիսկ, որ շատերի սիրած ու երազած ռուսի ներկայութիւնը թուլացնի նոյն շատերի թիւերը և նրանք վար դնեն իրենց գէնքերը, հիւսիսից եկածին թշնամի չհամարելով մեր հանրապետութեան ու մեր անկախութեան: Այդ լուրջ ու վտանգաւոր կասկածը չըջան է առնում այսօր ոմանց մէջ, որովհետեւ իրողութիւնը դալիս է այդ ասելու...

Իսկ ի՞նչ արաւ կառավարութիւնը նախապատրաստելու և կուէլու հէնց այդ վտանգի դէմ, որը դալիս է հիւսիսից և որի ներկայութիւնն այսօր մոռացնել է տալիս հարաւի մեր դարաւոր թշնամուն: Յաւ է ասել, որ կառավարութեան հաղորդադրութիւնը դրական փաստեր չուաւ այդ ուղղութեամբ: